

UVODNA RIJEČ

EDITORIAL

Poštovani čitaoci,

početne riječi novog broja glasila Saveza udruženja građana geodetske struke u Bosni i Hercegovine posvećene su trojici velikana, koji su nas nažalost zauvijek napustili tokom 2021. godine, a koji su svojim velikim zalaganjem i ogromnim trudom znatno doprinijeli afirmaciji i povećanju relevantnosti Geodetskog glasnika. Profesori Nihad Kapetanović, Yüksel Altiner i Mithad Kozličić bili su nadaleko poznati u svijetu nauke, a istovremeno su predstavljali istinske moralne vertikale, izuzetne gorostase skromnosti, poštenja i čovječnosti. Kroz obavljanje izazovnih funkcija glavnog urednika Geodetskog glasnika i članova Uredničkog odbora te objavljivanje mnoštva vrijednih naučnih članaka i drugih priloga, mnogo su učinili da naš časopis stekne respektabilan međunarodni ugled i izraste u ozbiljnu naučno-stručnu publikaciju. S odlaskom dragih profesora nestale su izvanredne ličnosti ali njihovo veliko djelo trajno ostaje.

Godina koja je iza nas obilježena je i događajima koji bi mogli predstavljati veliku prekretnicu za geodetsku struku u Bosni i Hercegovini i imati značajan uticaj na budući razvoj i usmjerenje geodezije u našoj zemlji. Tu se prije svega misli na formiranje Matične sekcije inženjera geodetske struke u okviru Inženjerske komore FBiH, čija je konstituirajuća sjednica održana početkom 2021. godine. Osnivanje spomenute Sekcije od izuzetne je važnosti radi zaštite interesa i položaja geodetske struke u našem društvu. Članovi Sekcije će zasigurno, kao i geodetski predstavnici u ranije formiranoj Inženjerskoj komori RS, intenzivno raditi na očuvanju i unaprijeđenju prava svih geodeta u BiH, zagovarati stručnost i etičnost te spremno i odlučno odgovoriti na goleme izazove 21. vijeka. Danas, kao nikada ranije, treba ulagati ogromne napore kako bi se očuvao ugled i odbranila osnovna načela geodetske profesije od raznoraznih pritisaka i neutemeljenih zahtjeva. Neumoljiva trka za profitom i želja za što bržom zaradom nikada ne smiju biti iznad pravila struke. Komore imaju veliku odgovornost za razvoj i samostalnost geodetske struke te je neophodno da aktivno djeluju na poboljšanju zakonskih okvira, permanentnom stjecanju novih kompetencija svojih članova, sveobuhvatnoj saradnji s drugim subjektima čije se djelovanje veže za prostor i njegove resurse i sl. Krajnji cilj treba biti stvaranje sigurnog radnog okruženja za bosanskohercegovačke geodete kroz uvođenje koncepta rada po mjeri čovjeka, što će neminovno dovesti do bolje produktivnosti i efikasnosti poslovanja radnih organizacija. Geodetskim predstavnicima u bosanskohercegovačkim inženjerskim komorama želimo puno sreće i uspjeha u radu.

U ovom broju Geodetskog glasnika možete pročitati zanimljive naučne i stručne članke iz područja fotogrametrije, geoinformatike, daljinskih istraživanja, više i inženjerske geodezije. Posebno raduje što su se u stvaranje našeg glasila uključile i mlade kolege, kroz interesantne priloge o zahtjevnim geodetskim radovima na izgradnji saobraćajnica. Uz veliku zahvalnost autorima tekstova, recenzentima i svima koji su pružili finansijsku pomoć za pokrivanje troškova štampanja ovog broja časopisa – Federalnom ministarstvu obrazovanja i nauke te geodetskim kompanijama Geobiro Konjic, GBM Group Sarajevo, GeoWild Sarajevo, Geodet Sarajevo, Zedis Zenica i AMG Visoko, želimo da provedete ugodno vrijeme uz stranice Geodetskog glasnika.

Nedim Tunjo